

Tur hende por para of sinta dilanti trailer durante parada di Carnaval

Pida tereno di dos meter dilanti trailer ta liber pa público ocupá



ORANJESTAD - Algun aña caba gobierno di Aruba ta aplicando algun regla relacioná cu celebracion di Carnaval, en particular riba stacionamento di trailer y demas construccinann pa mira parada di Carnaval.

Tres cuarto parti di e ruta ta wordo ocupá pa e casitanan mobil (algun ta full equipped) cu den un forma carnavalesco ta duna un toque total colorido y musical na e eventonan carnavalesco.

Presencia di trailers banda di caminda a bira un parti importante di e 'happening'.

Sinembargo un que otro falta algun claridad y splica-

cion.

Kiko ta un kavel?

Tur hende ta na altura di e hecho cu algun siman promé cu paradanan cuminzá tin oportunidad pa inscribí pa un kavel. Personan cu ta deseá un kavel pa pone nan trailer of otro construccion pa mira Carnaval por inscribí pa un kavel. Cu un poco suerte bo number ta wordo sacá for di e tómbola di manera cu bo ta haña un pida tereno pa pone bo trailer durante un cierto periodo. Cu un poco mas suerte bo ta haña un kavel net caminda unda bo ta preferá di para.

Un kavel ta dunabo derecho pa stacioná bo trailer, of construí bo "abri" (simpel

construccion cu un dak, pa sconde pa solo of awacero) banda di caminda bo por mira e parada di Carnaval. E kavel tin un largura di 6 meter. Pa loke ta su hanchura (e parti tras di e trailer) esaki no ta definí. Pues banda di caminda, tras di e trottoir un trailer por ocupá seis meter di largura di e tereno.

Loke mester sa tambe cu dilanti cada trailer mester tene dos meter habrí pa público-peaton.

Pues e pida dilanti e trailer no ta cai bao di e kavel y ta na liber uso di cualquier persona.

Por para dilanti un trailer?

Teniendo cuenta cu loke a wordo bisá aki riba cu un kavel no ta inclui uso exclusivo di e pida tereno-trottoir dilanti e trailer, e conclusion ta cu tur hende por para dilanti un trailer of pone su stul of otro rekisitos (ice-jug, saco cu pan y fruta y demas artículonan refrescante pa consumir). E dos meter tereno dilanti e trailer (trottoir of santo) no ta duna e ocupantenan di e trailer ningun derecho exclusivo di uso.

Tur hende por pone stul dilanti e trailer. Pues si tin algun hende a wordo strobá of impedí di para of sinta dilanti un trailer, esaki ta contra

ley. Actonan asina mester wordo notificá na polis mesora. Pasobra den un caso asina e ocupante di trailerman ta abusando di ley.

Mester aña lo siguiente tambe cu ningun hende tin un

derecho exclusivo riba un pida trottoir. Otro hende tambe por pone su stul banda di bo of para mira Carnaval tras di bo lugar di sinta.

Pasa un bon Carnaval e weekend venidero. ■ ESM